

卷二

疫證集說

陸潤庠題籤



煌然後可入於疫室

五疫列表

甲巳失守化成土疫晚至丁卯早至丙寅土疫至也  
丙辛失守化成水疫晚至己巳早至戊辰水疫至也  
乙庚失守化成金疫速至壬午徐至癸未金疫至也  
戊癸失守化成火疫甚則庚戌微則辛亥火疫至也  
丁壬失守化成木疫甚則甲申微則乙酉木疫至也

刺法列表

巳亥陰年火欲升而天蓬之水抑之當刺包絡之榮勞宮穴

巳亥陰年金欲降而地形之火窒之當刺心包絡之所出中衝穴手  
少陽所入天井穴

子午陽年土欲升而天衝之木抑之當刺足太陰之兪太白穴

子午陽年水欲降而地阜之土窒之當刺足太陰之所出隱白穴足陽明之所入三里穴

丑未陰年火欲升而天蓬之水抑之當刺包絡之榮勞宮穴

丑未陰年水欲降而地晶之金窒之當刺手太陰之所出少商穴手陽明之所入曲池穴

寅申陽年金欲升而天英之火抑之當刺手太陰之經經渠穴先左後右

寅申陽年火欲降而地元之水窒之當刺足少陰之所出湧泉穴足太陽之所入委中穴先左後右

卯酉陰年水欲升而天芮之土抑之當刺足少陰之合陰谷穴先左後右

卯酉陰年土欲降而地蒼之木窒之當刺足厥陰之所出大敦穴足

少陽之所入陽陵泉穴

辰戌陽年木欲升而天柱之金抑之當刺足厥陰之井大敦穴

辰戌陽年火欲降而地元之水窒之當刺足少陰之所出湧泉穴足太陽之所入委中穴

本病論篇曰四時不節即生大疫

民病列表

巳亥年火鬱證 民病伏陽內生煩熱心神驚悸寒熱間作久鬱暴熱化作溫癘火疫皆煩而燥渴渴甚治之以泄之可止

巳亥年金鬱證 民皆昏倦夜臥不安咽乾引飲懊熱內煩久而掉眩手足直而不仁兩脇作痛滿目忙忙

巳亥年太陽不退位 民病原闕

巳亥年厥陰不遷正 又病喜怒目系轉轉筋淋洩小便赤

子午年土鬱證 民病風厥涎潮偏痺不隨脹滿久而伏鬱化疫天  
亾臉支府黃疸滿閉

子午年水鬱證 民病大厥四肢重怠陰痿少力

子午年厥陰不退位 民病溫疫疵廢風生皆支節痛頭目痛伏熱  
內煩咽喉乾引飲

子午年少陰不遷正 又病寒熱四肢煩痛腰脊強直

丑未年火鬱證 民病伏陽在內煩熱生中心神驚駭寒熱間爭久  
鬱而化伏熱內煩痺而生厥甚則血溢

丑未年木鬱證 民皆風燥相伏懼清傷藏

丑未年少陰不退位 民病膈熱咽乾血溢驚駭小便赤澁丹瘤瘰  
瘡瘍留毒

丑未年太陽不遷正 又病手足肢節腫滿大腹水腫填臆不食殮

疫證集說卷之六素問三素論行

泄脇滿四肢不舉

寅申年金鬱證 民病上熱喘嗽血溢久鬱而化脇滿悲傷寒熱噎  
嗑乾手拆皮膚燥

寅申年火鬱證 民病面赤心煩頭痛目眩溫病欲作

寅申年太陰不退位 民病四肢少力食飲不下足脛寒陰痿閉塞  
失溺小便數泄注淋漓

寅申年少陽不遷正 又病痲瘡骨熱心悸驚駭甚則血溢

卯酉年水鬱證 民病注下食不及化久而成鬱厥逆而噦熱生於  
內氣痺於外足脛痠冷反生心悸懊熱暴煩復厥

卯酉年土鬱證 民病四肢不舉昏眩支節痛腹滿填臆

卯酉年少陽不退位 民病少氣寒熱更作便血上熱小腹堅滿小  
便赤沃甚則血溢

卯酉年陽明不遷正 又病寒熱欬嚏皮毛折爪甲枯焦甚則喘嗽  
息高悲傷不樂

辰戌年木鬱證 民病溫疫早發咽嗑乾四支滿支節皆痛鬱久而  
發卒中偏痺手足不仁

辰戌年火鬱證 民病面赤心煩頭痛目眩熱病欲作

辰戌年陽明不退位 民病嘔吐暴注食飲不下大便乾燥四支不  
舉目瞑掉眩

辰戌年太陽不遷正 又病溫癘喉閉嗑乾煩躁而渴喘息有音

壘按素問刺法本病二篇實爲言疫之祖篇中大旨推論六氣升  
降不前不遷正不退位及化運剛柔失守民病疫癘而詳述其刺  
治之法焉凡天氣之病曰疫地氣之病曰癘疫以氣言而癘以形  
言也所云治升之法木鬱治木金鬱治金治其本經也所云治降



之法木鬱治金金鬱治火折其所勝也所云刺法宜在何經即可  
爲按經用藥之準也茲將刺法民病二篇分年列表以便稽古者  
詳覽焉

### 素問小金丹

#### 治疫癘方

辰砂二兩水磨雄黃一兩葉子雌黃一兩紫金半兩愚按以金箔同藥研之可爲細末同入合

中外固下地一尺築地實不用爐不須製用柴火二十斤煨之也

七日終常令火不絕候冷七日取次日出合子合子即磁罐之屬取出順日研之順日研之

謂左旋也三百煉白沙蜜爲丸如梧子大每日望東吸日華氣一口水下

一丸和氣咽之服十粒無疫干也

### 難經

五十八難曰傷寒有幾其脉有變不然傷寒有五有中風有傷寒有

濕溫有熱病有溫病其所苦各不同

中風之脉陽浮而滑陰濡而弱濕溫之脉陽濡而弱陰小而急傷寒之脉陰陽俱盛而緊瀼熱病之脉陰陽俱浮浮之滑沈之散瀼溫病之脉行在諸經不知何經之動也各隨其經所在而取之

堯按傷寒溫熱瘟疫三種至晉時始分古人貴勝雅言總名傷寒秦越人言溫而疫賅焉已蓋古無瘟疫字概作溫字且當時熱病統於傷寒試觀仲景傷寒論何嘗不言溫亦何嘗不言疫洵如楊玄操難經註所謂溫病則是疫癘之病非爲春病也

選

傷寒論

張仲景撰

陰陽大論云春氣溫和夏氣暑熱秋氣清涼冬氣冷冽此則四時正氣之序也冬時嚴寒萬類深藏君子固密則不傷於寒觸冒之者乃名傷寒耳其傷於四時之氣皆能爲病以傷寒爲毒者以其最成殺

厲之氣也中而即病者名曰傷寒不即病者寒毒藏於肌膚至春變爲溫病至夏變爲暑病暑病者熱極重於溫也是以辛苦之人春夏多溫熱病皆由冬時觸寒所致非時行之氣也凡時行者春時應暖而反大寒夏時應大熱而反大涼秋時應涼而反大熱冬時應寒而反大溫此非其時而有其氣是以一歲之中長幼之病多相似者此則時行之氣也夫欲候知四時正氣爲病及時行疫氣之法皆當按斗曆占之

若更感異氣變爲他病者當依舊壞證病而治之若脉陰陽俱盛重感於寒者變爲溫瘧陽脉浮滑陰脉濡弱者更遇於風變爲風溫陽脉洪數陰脉實大者遇溫熱變爲溫毒溫毒爲病最重也陽脉濡弱陰脉絃緊者更遇溫氣變爲溫疫

晉

小品方

陳延之撰

古今相傳稱傷寒爲難治之疾瘟疫是毒病之氣而論治者不判傷寒與時行瘟疫爲異氣耳云傷寒雅士之辭天行疫瘟是田舍間號耳不說病之異同也考之衆經其實殊異矣

### 屠蘇酒

辟疫氣令人不染瘟病及傷寒歲旦之方

防風 大黃 白朮 桔梗 蜀椒 桂心 烏頭 華撥

右搗味咬咀絳袋盛以十二月晦日中懸沉井中令至泥正月朔旦平曉出藥置酒中煎數沸於東向戶中飲之屠蘇之飲先從小起多少自在辟瘟氣也

壘按本方去防風卽千金屠蘇酒方

### 大黃湯

療天行若已五六日不解頭痛壯熱四肢煩疼不得飲食

大黃半兩黃連半兩黃栢半兩梔子仁半兩

右四味切以水八升煮取六七沸內豉一升葱白七莖煮取三升

分三服

茅根湯

療溫病有熱飲水暴冷噦者方

茅根 葛根各切

右二味以水四升煮取二升稍溫飲之晚止則停

肘後方 葛稚川撰

傷寒時行溫疫三名一種耳又曰貴勝雅言總名傷寒世俗因號為

時行

道術符刻言五溫而所謂辟溫諸方亦辟疫之謂也

比歲有病天行發斑瘡頭面及身須臾周匝狀如火瘡皆戴白漿隨

決隨生不即療劇者數日必死療得差後瘡癥紫黯彌歲方滅此惡毒之氣也世人云以建武中於南陽擊虜所得仍呼爲虜瘡諸醫衆詳作療用之有效

天行虜瘡方

取好蜜通身摩瘡上亦以蜜煎升麻數數拭之亦佳

太乙流金散

辟溫氣

雄黃三兩雌黃六兩礬石一兩五錢鬼箭羽一兩五錢羚羊角二兩

右五味研末篩三角絳袋盛一兩帶心前并掛門戶上若逢大疫之年以月旦青布裹一刀圭中庭燒之溫病人亦燒熏之

斷溫疫轉相染著至滅門延及外人無收視者方

赤小豆 鬼箭羽 鬼白 雄黃各三兩

右四味搗末以蜜和丸如小豆大服一丸

百一方 陶弘景撰

神仙解毒萬病丸

解一切藥毒惡草菰子茵草金石毒吃自死馬肉河豚發毒時行疫氣山嵐瘴癘急喉閉纏喉風衝冒寒暑熱毒上攻或自縊死落水打折傷死但心頭微暖未隔宿者並宜用生薑蜜水磨十粒灌之須臾復甦癰疽發背未破魚臍瘡諸般惡瘡腫毒湯火所傷百蟲犬鼠蛇傷并東流水磨塗并服一粒良久覺痒立消打撲損傷松節酒磨下半粒乃以東流水磨塗男子急中及顛邪喝叫亂走女人鬼氣鬼胎並宜煖酒磨下一丸可分兩服有毒即吐或利毒盡自止孕婦不可服

文蛤

三兩 錘碎洗淨

紅芽大戟

一兩 五錢 洗淨

山慈菘

二兩 洗

續隨子

一兩 麝香 三錢 去油 研

脾

右將前三味焙乾爲細末入麝香續隨子研令勻以糯米粥爲丸  
每料分作四拾粒於端午七夕重陽日合如欲急用辰日亦得於  
木臼中杵數百下不得令婦人孝子不具足鷄犬之類見之

病源論 巢元方撰

疫癘病候曰其病與時氣溫熱等病相類皆由一歲之內節氣不和  
寒暑乖候或有暴風疾雨霧露不散則民多疾疫病無長少率皆相  
似如有鬼厲故云疫癘病

此病皆因歲時不和溫涼失節人感乖候之氣而生病則病氣轉相  
染易乃至滅門延及外人故須預服藥及爲法術以防之

凡瘟疫病新瘥脾胃尙虛穀氣未復若作勞妄動傷力并食豬羊鷄  
犬魚膾炙燔肥膩生果麵食硬澁難消之物停積腸胃膈悶腹脹便  
秘或大吐大下重復發熱病作不可救矣



疫癘皰瘡候曰熱毒盛則生皰瘡瘡周布徧身狀如火瘡色赤頭白者毒輕色黑紫黯者毒重亦名爲登豆瘡

堦按登豆瘡之登字實係登字之訛攷字書登與疏同楊升菴引唐六典有登豆音彎卽疏豆外臺引巢源曰其瘡形如疏豆亦名疏豆瘡尤爲可證

瘴氣候曰夫嶺南青草黃芒瘴猶如嶺北傷寒也南地暖故太陰之時草木不黃落伏蟄不閉藏雜毒因暖而生故嶺南從仲春訖仲夏行青草

殃注候曰注者住也言其病連滯停住死又注易傍人也人有染疫癘之氣致死其餘殃不息流注子孫親族得病證狀與死者相似故名爲殃注

唐

千金方

孫思邈撰

易稱天地變化各正性命然則變化之迹無方性命之功難測故有  
炎涼寒燠風雨晦冥水旱妖災蟲蝗怪異四時八節種種施化不同  
七十二候日月運行各別終其晷度方得成年是爲歲功畢矣天地  
尙且如然在人安可無事故人生天地之間命有遭際時有否泰吉  
凶悔吝苦樂安危喜怒愛憎存亡憂畏關心之慮日有千條謀身之  
道時生萬計乃度一日是故天無一歲不寒暑人無一日不憂喜故  
有天行瘟疫病者即天地變化之一氣也斯蓋造化必然之理不得  
無之故聖人雖有補天至極之德而不能廢之雖不能廢之而能以  
道御之其次有賢人善於攝生能知樽節與時推移亦得保全天地  
有斯瘴癘還以天地所生之物以防備之命曰知方則病無所侵矣  
然此病也俗人謂之橫病多不解治皆日日滿自差以此致枉者天  
下大半凡始覺不佳即須救療迄至於病愈湯食競進折其毒熱自

然而瘥。必不可令病氣自在。恣意攻人。拱手待斃。斯爲誤矣。今博採羣經。以爲上下兩卷。廣設備擬。好養者可得詳焉。

溫病時行大熱其脉細小者死

時行衄不宜斷之如一二升已上恐多者可斷卽以龍骨末吹之

虎頭殺鬼丸

虎頭骨

五兩炙

硃砂

一兩五錢研

雄黃

一兩五錢研

雌黃

一兩五錢研

鬼白

一兩

皂莢

一兩炙

燕莢

一兩

右辟溫方七味。搗篩以臘蜜和如彈丸。大絳囊盛繫臂。男左女右。家中置屋四角。月朔望夜半中庭燒一丸。忌生血物。

辟溫粉

川芎

白芷

藁本

各等分

右三味研下篩。內米粉中以粉身。

治溫疫方

黃白藥子二枚末水服之

治溫令不相染方

新布袋盛大豆一升內井中一宿出服七枚

隨身備急方

張文仲撰

夫瘴與瘧分作兩名其實一致或先寒後熱或先熱後寒嶺南率稱爲瘴江北總號爲瘧此由方言不同非是別有異病然南方溫毒此病尤甚原其所歸大畧有四一山溪毒氣二風溫痰飲三加之鬼厲四發以熱毒在此之中熱毒最重故所用藥物須審病源患瘧瘴之後特須防瘴而發痢死不旋踵所以然者瘴體先虛虛不宜痢又瘴宜冷瘥痢宜溫斷斷痢則益瘴斷瘴則益痢大率如此不可不慎療天行嘔哕方

研油麻汁煮菘豆令爛取半升許以手掌大狹皮燒作灰篩之內  
豆中和食

療虛煩不可攻方

青竹茹 二升

右一味以水四升煎至三升去滓分溫五服徐徐服之

外臺秘要 王燾撰

許仁則論陰陽傷寒者則毒氣傷陰陽氣也人身中有陰陽之氣陰  
陽者則寒熱也本以陰爲毒所傷則不能流行陽熱獨王故天行多  
熱者也以病於諸病之中最爲難療陰陽二病陰尤可憂耳時聞有  
此病而多倉卒死者不少

又云此病復發不但起動勞役或因飲食稍多或因言語過分或緣  
視聽不節或爲動轉不常皆成此復若復甚者乃至不救劇於初得

病時不可以復發而云輕易

崔氏療前軍督護劉車者得時疾三日已汗解因飲酒復劇苦煩悶乾嘔口燥呻吟錯語不得臥余思作此黃連解毒湯

黃連

三兩

黃芩

黃栢

各二兩

梔子

十四枚擘

右四味切以水六升煮取二升分二服一服目明再服進粥於此漸差余以療凡大熱盛煩嘔呻吟錯語不得眠皆佳傳語諸人用之亦效此直解熱毒除酷熱不必飲酒劇者此湯療五日中神效忌豬肉冷水

又療時行數日而大下熱痢時作白通諸藥多不得止吾思舊方多療傷寒後下痢耳未有尙在數日便兼除熱止下者也四逆湯熱白通苦溫故吾思作此湯以救數十人兼主傷寒黃連龍骨湯方

黃連

三兩止  
利除熱

黃栢

三兩止  
利除熱

熟艾

如鷄子一枚  
除熱毒止利

龍骨

二兩止  
利除熱

右四味以水六升煮取二升半分三服無不斷者忌猪肉冷水  
廣濟療天行惡寒壯熱頭痛大小便赤澁不下食飲柴胡湯

茵陳 七分 升麻 七分 芒硝 四分湯成下 柴胡 七分

大黃 十二分別漬 梔子 四枚擘 芍藥 七分 黃芩 十二分

右八味切以水四升先漬藥少時猛火煮取一升八合分溫三服  
服別相去如人行六七里喫一服以快利爲度第二服則利更不  
須服之忌熱食炙肉蒜粘食

又療天行壯熱欬嗽頭痛心悶前胡湯

前胡 升麻 各八分 貝母 紫苑 各六分 石膏 十二分碎綿裹

麥冬 八分去心 杏仁 三十枚去尖皮 竹葉 切一升 甘草 二分炙

右九味切以水八升煮取二升五合絞去滓分溫三服相去如人  
行六七里進一服不吐利差忌海藻菘葉油膩猪魚等

延年秘錄梔子湯主天行一二日頭痛壯熱心中熱者方

梔子 三兩

黃芩 三兩

豉 一升熬綿裹

葱白 切一升

石膏 四兩碎綿裹

乾葛

四兩切

右六味切以水七升煮取二升六合去滓分溫三服如人行八九里再服忌麪酒生冷等物

深師療天行毒病或下不止咽喉痛黃連馬通湯

小豆 一升

黃連 一兩去毛

馬通汁 三升

吳茱萸 一兩

右四味以馬通汁令煮取一升盡服不差復服有效忌豬肉冷水又療天行毒病鼻衄是熱毒血下數升者方

可取好松煙墨擣之以雞子白和丸丸如梧桐子大水下一服十丸並無所忌

近效主天行後兩脇脹滿方



熬鹽熨之如小便澁亦用鹽熨臍下如水腫以穀枝汁服愈大效  
又療天行三日外忽覺心口妨滿堅硬脚手心熱則變爲黃不療殺  
人秦芫湯方

秦芫 一兩 紫草 一兩 白蘚皮 一兩 黃芩 一兩 梔子 一兩

右五味切以水一大升半牛乳一大升煮取七合分爲二服老小  
以意量之一劑不愈更喫一劑試有效

集驗療天行熱病口瘡升麻湯方

升麻 一兩 通草 四兩 射干 二兩 羚羊角 三兩屑 芍藥 三兩

生蘆根 切一兩

右六味切以水七升煮取三升分爲三服如人行五里更服

刪繁療天行三日外七日不歇內熱令人更相染著大青消毒湯方

大青 四兩 香鼓 八合熬綿裹 乾葛 梔子 各四兩 生乾地黃 一升切

芒硝 三兩

右六味切以水五升煮諸藥取二升五合去滓下芒硝分三服忌  
蕪荑熟麪酒蒜等物

㊟ 太宗聖惠方

治時氣一日頭痛壯熱方

右取生葛根洗淨搗取汁一大盞內豉一合煎至六分去滓不計  
時候分爲二服有汗即差未得汗即再服若心中熱加梔子仁十  
枚內葛根汁中同煎去滓服之

治時氣二日頭痛背強身熱惡寒宜服梔子散方

梔子 一兩 黃芩 一兩 石膏 二兩 杏仁 一兩  
湯浸去皮尖雙仁麩炒微黃

葛根 一兩 剉 甘草 半兩  
炙微赤剉

右件藥搗羅爲散每服五錢以水一大盞入葱白二莖豉五十粒

煎至五分去滓不計時候熱服衣覆取汗

治時氣三日頭痛壯熱心神煩壅胸膈不利宜服柴胡散方

柴胡 人參 犀角屑 黃芩 麥門冬 各一兩 甘草 半兩 半夏 半兩

右件藥擣篩爲散每服五錢以水一大盞入生姜半分棗三枚煎至五分去滓不計時候溫服

治時氣四日熱渴不已往來寒熱不能飲食宜服知母散方

知母 枳實 柴胡 地骨皮 各一兩 梔子仁 麥門冬 甘草 各半兩

右件藥擣篩爲散每服五錢以水一大盞煎至五分去滓不計時候溫服

治時氣五日大熱三部脉悉洪數者可之宜服大黃飲子方

川大黃 二兩半剉碎微炒 梔子仁 三錢 枳殼 半兩麩炒 黃芩 一兩

淨朴硝 一兩五錢 甘草 半兩炙微赤剉

右件藥都細剉和勻每服半兩以水一大盞煎至五分去滓不計時候溫服

治時氣六日煩躁頭痛小便赤澁壅熱不退宜服羚羊角散方

羚羊角屑三分 川升麻三分 秦艽三分 木通三分剉 白鮮皮三分

柝榔一兩 黃芩三分 麥冬一兩去心焙 川大黃一兩剉碎微炒

甘草半兩炙微赤剉

右件藥搗篩爲散每服五錢以水一大盞煎至五錢去滓不計時候溫服

治時氣七日心神煩熱胸膈不和目赤不得睡臥宜服羚羊角丸方

羚羊角屑 黃芩 梔子仁 黃連去鬚 川升麻

枳壳麩炒去瓢以上各一兩

右件藥搗羅爲末煉蜜和丸如桐子大每服三十丸不計時候以

竹葉湯下

治時氣八九日不解心腹堅滿身體疼痛內外皆熱煩嘔不安宜服

前胡散方

前胡 一兩

半夏

一兩湯洗七遍

枳殼

三分麩炒去瓢

赤芍藥 二分

黃芩 三分

麥門冬

一兩去心

右件藥搗篩為散每服五錢以水一大盞入生姜半分竹茹一分

煎至五分去滓不計時候溫服

治時氣頭痛不可忍者宜淋頂湯方

石膏 十兩搗碎

梔子仁 三兩

竹葉 一握

甘菊花 三兩

豉心 三合

葱白 十四莖切

右件藥以水二大碗煮取三碗去滓內有嘴瓶中稍熱淋注頂上

治時氣發狂叫呼不識人宜服此方

黃連 一兩去鬚 秦艽 一兩去苗 梔子仁 一兩 鐵粉 二兩

右件藥搗細羅爲散每服二錢不計時候以新汲水調下

### 紫雪法

紫雪法治脚氣毒徧內外煩熱口中生瘡狂易叫走解諸藥毒發熱卒黃疫病毒氣傷寒溫瘡五尸五疰心腹諸疾疔刺疼痛蠱毒鬼魅邪氣驚癇並皆治之

金 五十兩 寒水石 三斤 石膏 三斤 元參 一斤 羚羊角屑 五兩

犀角屑 五兩 沉香 五兩 木香 五兩 丁香 二兩 甘草 半斤生用

淨朴硝 十斤

右件藥除金朴硝外並搗羅爲散內金以水五斗煮取二斗去滓下朴硝於汁中緩火煎以柳木篋攪不住手候欲凝入研了朱砂三兩麝香末一兩急攪卽成紫色傾入瓷器中經宿取出研細每

服以冷水調二錢服之量人老少以意加減

堯按本事方無黃金有滑石磁石升麻硝石局方從本事加黃金  
黃雪法

黃雪治風熱療天行瘴毒壓丹石安心神止狂熱神效方

淨朴硝 五斤 川大黃 二兩 黃芩 三兩 山梔子 二兩 犀角屑 二兩

紫石英 二兩細研 甘草 三兩生用 竹茹 三兩 麝香 半兩細研

朱砂 一兩細研 羚羊角屑 三兩

右件藥除朴硝紫石英朱砂麝香外並細剉以水一斗二升煎至  
五升去滓澄清以文火更煎之下朴硝以柳木攪勿住手候稍稠  
卽下紫石英朱砂末攪令勻候欲凝結始下麝香末攪令勻傾放  
料盆中經宿取出擣羅爲末每服一錢至二錢以甘草湯調下老  
少以意加減服之

治時氣五六日壯熱骨節煩疼連心兩脇氣脹急硬痛不能食變爲黃宜服柴胡散方

柴胡

去苗

枳實

麩炒令微黃

瓜蒌根

黃芩

梔子仁

茵陳

龍膽草

去蘆頭

川大黃

剉碎微炒各一兩

甘草

半兩炙微赤剉

右件藥搗篩爲散每服五錢以水一大盞煎至五分去滓不計時

候溫服

治山瘴瘧方

鬼白

半兩

赤小豆

三兩

鬼箭羽

半兩

朱砂

半兩細研

雄黃

半兩細研

阿魏

半兩別研

右件藥搗羅爲末都研令勻用酒煎阿魏爲膏和丸如梧桐子大每用一粒繫中指上男左女右嗅之如未差即以井華水服一丸

卽差



治山瘴瘡不相染除毒氣方

香豉 一合

右以水一大盞煎至半盞去滓溫服

又方

生葛根不拘多少

右搗絞取汁極意飲之去熱毒氣自然而差

治時氣熱毒上攻咽喉疼痛宜服射干散方

射干

川升麻

麥冬

去心

甘草

炙微赤剉

犀角屑

已上各三分

馬蘭根

半兩

右件藥搗篩爲散每服三錢以水一中盞煎至六分去滓不計時

候溫服

治時氣熱毒攻咽喉宜含化太陰玄精丸方

太陰玄精石 細研 川升麻 玄參 射干 寒水石 細研

甘草 炙微赤剉已上各半兩 馬牙硝 一兩細研

右件藥搗羅為末用牛蒡根搗汁和丸如櫻桃大小以含一丸

津

治時氣發豌豆瘡初覺宜服此方

川大黃 半兩剉碎微炒

右以水一大盞煎至七分去滓分為二服日三四服之

治時氣鼻衄煩躁不止頭痛氣逆宜服石膏飲子方

石膏 二兩 甘草 半兩 赤芍藥 一兩 黃芩 一兩

柴胡 一兩 桂心 半兩 生地黃 三兩 竹茹 二兩

右件藥細剉和勻每服半兩先以水一大盞半浸伏龍肝二兩澄

取清一大盞煎至五分去滓不計時候溫服

治時氣熱毒在臟譫語口乾宜服犀角圓方

犀角屑 馬牙硝各一兩 鐵粉一兩

梔子仁一兩 大黃一兩 甘草半兩

右件藥搗羅爲末煉蜜爲圓如梧桐子大不計時候以淡竹葉湯

下三十圓

治時氣病差後勞復發熱嘔吐不下宜服蘆根飲子方

蘆根二兩 竹茹二兩 人參二兩 陳橘皮一兩 生薑二兩 石膏四兩

右件藥都剉和勻每服半服以水一大盞煎至五分去滓不計時

候溫服

治時氣十日以上時有嘔逆欲得飲水此胃中伏熱不散宜服犀角

散

犀角屑 麥門冬 黃芩 朴硝 蘆根各二兩 石膏四兩

竹茹 生薑各二兩

右件藥都剉和勻每服半兩以水一大盞煎至五分去滓不計時候溫服

夫小兒時氣病者是四時之間忽有非節候之氣如春時夜暖而反寒夏時夜熱而反冷秋時夜涼而反熱冬時夜寒而反溫其氣傷人爲病則頭痛壯熱大抵與傷寒相似無問長幼其病形證畧同言時氣者是通行之氣故名時氣世亦呼爲天行也

治小兒時氣咳嗽壯熱麥門冬散方

麥門冬 一兩去心焙

杏仁 半兩湯浸去皮尖雙人麩炒微黃

赤芍藥 半兩

川升麻 一兩

貝母 三分炒微黃

甘草 半兩炙微赤剉

右藥搗羅爲散每服一錢以水一小盞煎至五分去渣入淡竹瀝半合更煎一兩沸不計時候量兒大小分減溫服

治小兒時氣浴法

右取桃枝去皮細剉以水煮十餘沸去滓取水沐浴汗出爲度

嘉佑補注神農本草

夫病之所由來雖多端而皆關於邪邪者不正之因謂非人身之常理風寒暑濕饑飽勞逸皆各是邪非獨鬼氣疫癘者矣人生氣中如魚在水水濁則魚瘦氣昏則人病

蘇沈良方

沈存中 蘇東坡撰

東坡曰攝生家多言夢遺甚於房勞此殆不然予嘗驗之人之病天行未復而犯房勞者多死至於夢遺則未嘗致困此決然可知但夢遺自有輕重耳

聖散子

麻黃 附子 細辛 炙甘草 柴胡 防風 藁本 獨活

蒼朮 厚朴 枳殼 藿香 製半夏 吳茱萸 高良薑  
草豆蔻 白朮 白芍 豬苓 茯苓 澤瀉 石菖蒲  
剉焙作散每服三錢空心下

堯按陳無擇三因方云此藥實治寒疫因東坡作序天下通行辛  
未年永嘉瘟疫被害者不可勝數蓋當東坡時適因寒疫流行也  
錄此姑備寒疫治療之一格用者宜詳審焉

傷寒總病論 龐安時撰

疫氣之發大則流行天下次則一方次則一鄉次則偏著一家悉由  
氣運鬱發有勝有伏遷正退位之所致也視斯疾者其可不推運氣  
而治之乎

春有青筋牽證其候頸背雙筋牽急先寒後熱腰強急脚縮不伸脘  
中欲折或眼黃項背強直夏有赤脈攢證其候口乾舌裂咽塞戰掉

驚動不定秋有白氣狸證其候經絡壅滯皮毛堅發泄體熱生斑  
氣喘引飲冬有黑骨瘟證其候腰痛欲折胸脅如刃刺切痛心腹膨  
脹四季有黃肉隨證其候頸下結核頭重項直或皮肉強硬而隱隱  
發熱

傷寒瘟疫禁忌飲酒合陰陽復病必死生鱸煮麵酒韭葷鱔豆粉  
犬羊肉腸血生菓油肥之類食之皆發熱黃下利不救又諸勞動皆  
致復尚可治女勞多死

太平惠民和劑局方

不換金正氣散

蒼朮 厚朴 陳皮 藿香 製半夏 甘草 生薑 棗

水煎服

傳信適用方 吳彥夔撰

香芎散

治傷寒傷風鼻塞頭痛及時行瘟疫老幼皆可服之

香附子

炒去皮六兩

川芎

香白芷

甘草

炙已上各二兩

藿香葉

四兩

石膏

二兩研如粉

右同為細末每服一錢熱茶調下不計時候

徽宗聖濟總錄

嶺南朴蛇瘴一名鎖喉瘴項大腫痛連喉用赤足蜈蚣一二節研細

水下即愈

三因方

陳無擇撰

斯疾之召或溝渠不泄穢惡不修薰蒸而成者或地多死氣鬱發而成者或官吏枉抑怨讟而成者世謂獄瘟場瘟墓瘟廟瘟社瘟山瘟海瘟家瘟灶瘟歲瘟天瘟地瘟等不可不究



春發瘟疫其症發熱腰痛強急脚縮不伸胸中欲折目中生花或瀉  
瀉增寒復熱

夏發燥疫其症身體戰掉不能自禁或內熱口乾舌破咽塞聲嘶  
秋發寒疫其症頭重頸直皮肉強痺或縮而結核起於咽喉頸項之  
側布熱毒於皮膚分肉之中

冬發濕疫其症乍寒乍熱損傷肺氣暴嗽嘔逆或體熱發斑喘咳引  
氣

夫疫難以三事鍾成若天行多假六經淫反錯鬱折而致之者既有  
寒溫兩疫風溼其可不辨但證似傷溼而脉色不同與夫一方相染  
長幼同病卽當作疫

活人書 朱肱撰

一歲之中得病病無分長幼率皆相似此則時行瘟疫氣俗謂之天

行是也

仲景云冬溫之毒與傷寒大異蓋傷寒者傷寒氣而作冬溫者感溫氣而作寒疫者暴寒折人非觸冒之過其治法不同所施寒熱溫涼之劑亦異

調中湯

治夏發燥疫口乾咽塞

大黃

一錢五分

黃芩

芍藥

葛根

桔梗

赤茯苓

藁本

白朮

甘草各一錢

水煎服

仁濟直指

楊士瀛撰

瘴瘧挾嵐瘴溪源蒸毒之氣致然也自嶺以南地毒苦炎燥濕不常人多瘴瘧其狀血乘上焦病欲來時令人迷困甚則發躁狂妄亦有啞不能言者皆由敗血瘀於心毒涎聚於脾

疫證集說  
仁濟直指  
傷寒標本  
二十一  
素  
蓋  
刊  
行

瘰癧一名蛇瘡蠻烟瘡雨之鄉多毒人有不服水土風氣而感觸之者必發蛇瘡

傷寒標本 劉完素撰

凡傷寒疫癘之病何以別之蓋脉不浮者傳染也設若以熱藥解表不惟不解其病反甚而危殆矣其治之法自汗宜以蒼朮白虎湯無汗宜滑石涼膈散散熱而愈其不解者通其表裏微甚隨證治之而與傷寒之法皆無異也雙解益元散皆為神方

傷寒心要 同上

第一雙解散 通聖合益元

防風通聖散

防風 川芎 當歸 赤芍藥 大黃 麻黃 連翹

芒硝 各半兩 石膏 黃芩 桔梗 各一兩 甘草 二兩 滑石 三兩

荊芥 白朮 梔子 各二錢半

右爲散每服三錢水一盞薑三片煎六分溫服大黃芒硝麻黃三味對症加入自利去大黃芒硝自汗去麻黃

天水散 益元 六一

滑石 六兩 甘草 一兩

右爲末每服三錢溫蜜水調暑月冷水亦可和解傷寒傷風發汗葱白五寸豆豉五十粒煎一盞調四五錢并三服解利爲度加薄荷尤妙

儒門事親 張子和撰

傷寒時氣瘟病嘗六七日之間不大便心下堅硬腹脅緊滿止可大小承氣湯下之其腸胃積熱慎勿用巴豆杏仁性熱大毒之藥雖用一二丸下之利五七行必反損陰氣涸枯津液燥熱轉增發黃譫語

狂走斑毒血泄悶亂輕者爲勞復重者或至死間有愈者幸矣不可  
以爲法

凡解利傷寒時氣疫疾當先推天地寒暑之理以人參之南陲之地  
多熱宜辛涼之劑解之朔方之地多寒宜辛溫之劑解之午未之月  
多暑宜辛涼解之子丑之月多凍宜辛溫解之少壯氣實之人宜辛  
涼解之老弱氣衰之人宜辛溫解之病人因冒寒食冷而得者宜辛  
溫解之因役勞冒暑而得者宜辛涼解之病人稟性怒急者可辛涼  
解之病人稟性和緩者可辛溫解之病人兩手脉浮大者可辛涼解  
之兩手脉遲緩者可辛溫解之如一概而用皆不知變通者

病機氣宜保命集 張潔古撰

夫大頭病者是陽明邪熱太甚資實少陽相火而爲之也多在少陽  
或在陽明或傳太陽視其腫勢在何部分隨經取之濕熱爲腫木盛

爲痛此邪見於頭多在兩耳前後先出皆主其病也治之大不宜藥  
速速則過其病所謂上熱未除中寒復生必傷人命

堯按病機氣宜保命集始刊於金末楊威誤作劉完素著明初寧  
王權重刊亦沿其誤至李時珍始糾其謬而定是書爲張元素本  
詳四庫全書

### 潔古雄黃丸

治時疾不相染

雄黃

一兩研

赤小豆

炒

丹參

鬼箭羽

各一兩

右爲細末煉蜜爲丸如梧桐子大每服日空心溫水下五丸可與  
病人同床着衣服亦不相染矣

內外傷辨惑論

李東垣撰

向者壬辰改元京師戒嚴迨三月下旬受敵者凡半月解圍之後都

內外傷辨惑論

人之不受病萬無一二既病而死者繼踵而不絕都門十有二所每日各門所送多者二千少者不下一千似此者幾三月此百萬人豈俱感風寒外傷者耶

普濟消毒飲

治大頭天行初覺憎寒體重次傳頭面腫盛目不能開上喘咽喉不利口渴舌燥

黃芩 黃連 連翹 薄荷 桔梗 牛蒡 馬勃 板藍根  
元參 蠶 升麻 柴胡 陳皮 人參 炙甘草  
便秘加大黃 煎湯服



衛生寶鑑 羅謙甫撰

漏盧散

治藏府積發而腫毒時疫疔瘡頭面紅腫咽嗑堵塞水藥不下一

切危惡疫癘

漏蘆 升麻 大黃 黃芩 藍葉 玄參 各三兩

右爲粗末每服二錢水煎腫熱甚加芒硝二錢半

消毒丸

治時毒疙瘡惡證

大黃 牡蠣煨 白佳蠶炒各一兩

右爲細末煉蜜爲丸彈子大新汲水化下一丸內加桔梗鼠粘子

尤妙

此事難知 李東垣撰王好古述

夫大頭病者雖爲在身上熱邪伏於內又感天地四時非節瘟疫之氣所以成此疾至於潰裂膿出而又染他人所以謂之疫癘也陽明爲邪首大腫少陽爲邪出於耳前後



治法當先緩而後急先緩者邪見於無形之處至高之分當緩緩服之寒藥則酒浸酒炒皆是也後急者邪入於有形之所此為客邪當急去之

瑞竹堂經驗方 沙圖穆蘇撰

啞瘴咽喉乳蛾方

雄黃 五錢研

鬱金 五錢

生白礬 二錢半研

膽礬 半錢研

右為極細末以竹筒吹喉中立能言語

世醫得效方 危亦林撰

時疫之脈無定據隨時審思乃得未可輕議

凡瘟家自生惡氣聞之即上泥丸散入百脈轉相傳染若倉卒無藥以香油抹鼻端及以紙撚探鼻嚏之為佳

荆防敗毒散

治瘟疫及大頭瘟

羌活 獨活 柴胡 前胡 赤茯苓 人參 枳壳 桔梗

川芎 荊芥 防風 甘草 水煎服

萬病解毒丸

文蛤 一兩半 山茨菰 一兩 續隨子 半兩 麝香 一錢 大戟 七錢半

全蝎 五枚 山豆根 半兩 朱砂 二錢 雄黃 二錢

主療修製同上百一方神仙解毒萬病丸

丹溪心法 朱震亨撰

溫疫衆人一般病者是又謂之天行時疫治有三法宜補宜散宜降  
又曰大頭天行病乃濕熱在高巔之上切勿用降藥

以竹筒兩頭留節中作竅納甘草於中仍以竹木釘塞其竅於大糞  
缸內浸一月取出晒乾用治疫毒

丹溪心法 卷之五 治疫方 一十五

端效方 闕名

時疫疔瘡腫毒病者古方書論所不見其說古人無此病故方無此說惟正隆楊公集拯濟方內言自天眷皇統間生於嶺北次於太原後於燕薊山野村坊頗罹此患至今不絕互相傳染多致死亡至有不保其家者狀如雷頭攻內則咽喉堵塞水藥難通攻外則頭面如牛視聽俱非杜絕聞見病惡命危惟汗之益深疎利頗差初見憎寒稍厥飲水脉沉不可辛溫發汗急以大黃芒硝之類苦泄寒涼之劑加倍併服得快利方可爲救毒氣稍退漸減涼藥理之咽堵食藥不下先灌生油半盞自然能通

外科精義 齊德之撰

夫時毒者爲四時邪毒之氣而感之於人也其候發於鼻面耳項咽喉赤腫無頭或結核有根令人增寒發熱頭痛肢體痛甚者恍惚不

審咽喉閉塞人不識者將爲傷寒便服解藥一二日腫氣益增方悟始召瘡醫原夫此疾古無方論世俗通爲丹瘤病家惡言時毒切恐傳染考之於經曰人身忽經變赤狀如塗丹謂之丹毒此風熱惡毒所爲謂之丹瘤與夫時毒特不同耳蓋時毒者感四時不正之氣初發如傷寒五七日之間乃能殺人治之宜精辨之先診其脈滑數浮洪沉緊弦澁皆其候也蓋浮數者邪在表也沉澁者邪氣深也認是時毒氣實之人急服化毒丹以攻之實熱以五利大黃湯下之其有表證者解毒升麻湯以發之或年高氣弱者五香連翹湯主之又於鼻內啗通氣散取十餘嚏作效若啗藥不嚏者不可治之如嚏出膿血者治之必愈如左右看病之人日日用啗藥嚏之必不傳染切須忌之其病人每日用嚏藥三五次以泄熱毒此治時毒之良法也經三四日不解者不可大下猶宜和解之服犀角散連翹散之類至七

八日大小便通利頭面腫起高赤者可服托裡散黃耆散宜針鏃砭  
割出血泄其毒氣十日外不治自愈也此病若五七日已前精神昏  
亂咽喉閉塞語聲不出頭面不腫食不知味者必死之候治之無功  
矣然而此疾有陰有陽有可汗有可下嘗見一工但知熱毒只用寒  
藥殊不知病有微甚治有逆從不可不審者矣  
通氣散

治天行大頭瘟頭面赤腫或咽喉閉塞用此取噴嚏七八遍泄出  
毒氣則差看病之人用此取嚏亦不傳染

玄胡索 一錢五分

皂角

川芎 各一錢

藜蘆 五分

躑躅花 二分五厘

右爲末用紙撚蘸藥入鼻中取嚏日三五次

醫經湖洄集 王安道撰

仲景所叙陰毒證不過面目青身痛如被杖咽喉痛而已并不言陰

寒極甚之證所治方亦不過升麻甘草當歸鱉甲而已并不用大溫  
大熱之藥是知仲景所謂陰毒者非陰寒之病乃是感天地惡毒異  
氣入於陰經故曰陰毒後人所叙陰毒只是內傷冷物或不正暴寒  
所中或過服寒藥所變或內外俱傷於寒而成非天地惡毒異氣所  
中與仲景所叙自是兩般豈可混論

疫證集說卷二終